

ւորելու համար դուրս էր եկել գիւղի ամբողջ բնակչութիւնն ու գաղթակա-
նութիւնը: Ժողովրդի առջևից գնում էին Սասունի գիւղիցիոնի ձիաւոր
հարիւրեակը Մուշեղի գլխաւորութեամբ, տեղական վաշտը և Նապոնը մի
քանի ձիաւորներով: Ապա գալիս էին որբերը՝ հայկական և ամերիկեան
գրօշակներով: Որբերին հետևում էր հոգևորականութիւնը՝ խաչ ու խաչ-
վառով և աղ ու հացով: Տեսարանը վերին աստիճանի սրտառուչ էր. հրդեհի
ու փոթորիկների բովից անցած ժողովուրդը ընդունում էր իր հարազատ
իշխանութիւնը...

Մայիս 12-ին գորբերն առաջ շարժւեցին դէպի Շարուր-Նախիջևան:
Նոյն օրը, փոխ-վարչապետ Սատիսեանը, գոր. Դևին, Դրօն և Գ. Վարչա-
մեանը առաջին դնացքով Երևանից մեկնեցին Նախիջևան: Նախիջևանցիները,
սկզբում, մերժեցին ճանաչել Հայաստանի իշխանութիւնը, բայց գոր. Դևիի
կտրուկ պահանջի վրա տեղի տւին և ընդունեցին Գ. Վարչամեանի ընդհանուր
նահանգապետութիւնը: Մայիս 20-ին Նախիջևան մտան և հայկական
գորբերը:

Այսպիսով, ապրիլ-մայիս ամիսներին կատարւեց Ռուսահայաստանի
ամբողջացման գործը. հայկական գորբերը կանգնած էին Զուլֆայում, Զին-
գիլում և Կարաուրգանում:

Հայկական շրջանների գրաւման հետ և դեռ առաջ տեղից շարժւեց և
գաղթականութիւնը: Թիւրքերի հեռանալու լուրը ելեկտրական արագու-
թեամբ տարածւեց երկրի բոլոր մասերում և աննկարագրելի ցնծութիւն
առաջ բերեց ամէն տեղ: Սկսեց տարերային մի շարժում: Առանց սպասելու
կառավարութեան կարգադրութեան, առանց նոյնիսկ ճշտելու լուրի ճշտու-
թիւնը, գաղթականութիւնը ուղղւեց թափով դէպի սահման: Էջմիածնում ու
Ղարաքիլիսայում կուտակւեցին ահագին բաղմութիւններ: Եւ որովհետև
դանդաղում էին պարպել գրաւած վայրերը, գաղթականութեան համար
ստեղծւեց անտանելի կացութիւն — շաբաթներով մնում էին բաց երկնքի
տակ, ենթակայ սաստիկ ցրտերի կամ անձրևների: Եւ չնայած դրան, ամէն
օր հասնում էին նորանոր խմբեր՝ սայլերով, եզներով, ֆուրգոններով, ոտով:
Մասնաւորապէս անհամբեր էին սուրմալուեցիները, դամարլուեցիներն ու
սարգարապատցիները: Միայն Էջմիածնի շրջանում խոնկել էր մօտ 140,000
գաղթականութիւն:

Կառավարութեան ճիգերը՝ կազմակերպելու և ծրագրւած ձև տալու
այդ հոսանքին՝ առանձին յաջողութիւն չունեցան: Տարերքը աւելի ուժեղ
էր: Բայց և այնպէս, կարելի եղաւ, որոշ չափով, մեղմացնել գաղթակա-
նութեան տառապանքը և, հնարաւորութեան սահմաններում, կազմակերպ-
ւած ձև տալ վերադարձի գործին: Ներքին գործոց նախարարութիւնը,
առաջին հերթին, յատկացրեց մէկ միլիոն ռուբլի գաղթականութեան
սնունդ ու դեղօրայք հասցնելու համար, իսկ Հայաստանի Սորհրդի գաղթա-
կանական յանձնաժողովը հանեց հետևեալ որոշումները.